

丹候第一

《巢氏病源》小兒丹候：風熱毒瓦斯，客在腠理，熱毒搏於血氣，蒸發於外，其皮上熱而赤，如丹之色，故謂之丹也。若久不瘥，即肌肉爛傷。(《聖惠方》若久不歇則肌肉壞爛，若毒瓦斯入腹則殺人也。)

土虺丹：發兩手指，作紅絲，迤漸下行至關節，便殺人。(以下丹無方者，可於一切丹門中求之)。

眼丹：眼卒然赤腫，生翳，至有十數翳者是也。

五色丹：發而變改無常，或青、黃、白、黑、赤。茱萸丹：發初從背起，遍身如細纈。

赤丹：丹之純赤色者是也。

白丹：初發癢痛，微虛腫，如吹奶起，不痛不赤，而白色者是也。

黑丹：初發癢痛，或腫起，微黑色者是也。

殃火丹：發兩脅及腋下膀上。

神火丹：發兩膀，不過一日便赤黑。

野火丹：發赤斑斑如梅子，遍背腹。

骨火丹：初發在臂起，正赤若黑。

家火丹：初發著兩腋下，兩膀上。

火丹：往往如傷寒，赤著身而日漸大。

丹火：其狀發赤，如火之燒，須與漿起者是也。

朱田火丹：先發背起遍身，一日一夜而成瘡。

天灶火丹：發兩膀裡尻間，正赤流陰頭，赤腫血出。

赤流丹：身上或一片片赤色，如燕脂染及，漸引，俗謂之流。若因熱而得者色赤，因風而得者色白，皆腫而壯熱是也。

赤游腫：其狀皮膚赤而腫起，行游不定者是也。

風火丹：初發肉黑，忽腫起。暴火丹之狀帶黑色。

游火丹：發兩臂及背如火灸。

石火丹：發通身，自入起如細粟大，色青黑。

鬱火丹：發從背起。

赤黑丹：本是毒熱折於血氣，蘊蒸色赤而複有冷氣乘之，冷熱互交，更相積瘀令色赤黑。厲火丹：發初從髀下起，背赤能移走。飛火丹：著兩臂及背膝。

留火丹：發一日一夜便成瘡，如棗大正赤色。

藍注候：小兒為風冷乘其血脈，血得冷則結聚成核，其皮肉色如藍，乃經久不歇，世謂之藍注。

《顛凶經》：黃帝問歧伯曰：後生少稚多被惡疾、丹毒，二品昔分？歧伯曰：陽解百年一十以上為毒，一十以下為丹。丹毒一也，隨其大小分別之。治之有毒至依方萬無一差。喻人問：男女皆遭丹毒之有毒至體，此枉死者復何限哉。良由信邪師之語，仍被恐之。過昧之人，勿與下手，請依方用之。今出此圖形狀如後。伊芳火丹從兩脅起。神灶丹從肚起。尿灶丹從踝起。胡吹灶丹從陰囊上起。天火丹從腹背遍身起。天雷丹從頭項起。

火丹從背甲起。胡漏灶丹從臍中起。廢灶丹從曲臂起。神氣丹從頭背上起。土灶丹從陰踝起。朱黃丹赤豆色遍身上起。螢火丹從耳起。野龜丹從背脊起。鬼火丹從面上起。

《嬰童寶鑑》小兒諸般丹毒歌：

丹火初成似火燒，天火渾身赤轉饒。伊芳火膀邊青黑色，厲從額上起根苗。臀並穀道丹毒，如帶紅暴火調。留火發時一日甚，變改無時五色。家火頰連雙腋乳，天灶內腫到陰尻。背並膝赤飛丹病，股內臍陰尿灶招。

一切丹第二

《本草》治小兒諸熱丹毒。

上並以水銀服，生銀少許，功勝紫雪。

《千金》治小兒丹毒方。

上搗慎火草，絞取汁，塗之良。

《千金》治丹毒大赤腫，身壯熱，百治不折方。

寒水石(十六銖，《聖惠》用二十四銖) 石膏(十三銖，《聖惠》用二十四銖) 藍青(十二銖，冬用乾者，《聖惠》同) 犀角(八銖，《聖惠》用二十四銖) 柴胡(八銖，《聖惠》用二十銖) 杏仁(八銖，《聖惠》用二十四銖) 知母(十銖，《聖惠》用十二銖) 甘草(炙，用五銖，《聖惠》用十二銖) 羚羊角(鎊)屑，六銖，《聖惠》用三分) 芍藥(七銖，《聖惠》用三分) 梔子(十二銖，《聖惠》同) 黃芩(七銖，《聖惠》用二十四銖) 竹瀝(一升) 生葛汁(四合，澄清) 蜜(二升，《聖惠》同)

上十五味 咀，以水三升，並竹瀝，煮取一升三合，去滓，內杏仁脂、葛汁、蜜，微火煎取二升。一、二歲兒服二合，大者量加之。(《聖惠》藍青散，藥味同，分兩不同。)

《千金》治小兒丹腫及風毒、風疹。麻黃湯方

麻黃(去根節，一兩半) 甘草(炙) 獨活 射乾 桂心 青木香 石膏 黃芩(各一兩)

上八味 咀，以水四升，煮取一升。三歲兒分為四服，日再。

《千金》治小兒惡毒丹及風疹，麻黃湯方

麻黃 升麻 葛根(各一兩) 射乾 雞舌香 甘草(炙。各半兩) 石膏(半合)

上七味 咀，以水三升，煮取一升。三歲兒分三服。日三。

《千金》治小兒數十種丹 湯方

大黃 甘草(炙) 當歸 芎 白芷 獨活 黃芩 芍藥 升麻 沉香 青木香 木蘭皮 芒硝(各三兩)

上十三味 咀，以水一斗二升，煮取四升，去滓，內芒硝，以綿湯中，適寒溫之，乾則易之，取瘥止。

《千金》治小兒丹毒方。

上搗馬齒莧一握，取汁飲之，以滓敷之。(《聖惠》絞汁塗之。)

《千金》又方

上搗赤小豆五合，水和取汁，飲之一合良，滓塗五心。

《千金》又方

上濃煮大豆汁塗之良。瘥亦無癢痕。

《千金》又方

上用臘月豬脂和釜下土敷之，乾則易。

《千金翼》治小兒丹腫方。

棗根 升麻 白朮 黃柏 黃連 大黃 梔子 甘草(生用。各二兩) 生地黄汁(一升)

上九味切，以水一斗四升，煮取七升去滓。內地黃汁煎三沸，以故帛兩重內湯中，以丹上。小暖即易之，常令溫。

《千金翼》澤蘭湯 主丹疹入腹殺兒方。

澤蘭 芎 附子(炮，去皮) 莽草 本 細辛 茵芋(各半兩)

上七味 咀，以水三升，煮取一升半，分四服。服此湯然後作余湯洗之。

《千金翼》湯 主丹、癰疽始發 熱，浸長進方兼主小兒丹長。忌近陰。

升麻 黃連 大黃 芎 羚羊角 當歸 甘草(各二兩) 黃芩(三兩)

上八味以水一斗，煮取五升去滓，又還鑊中，內芒硝三兩，火上令一沸，貼帛 腫上數過，腫熱便隨手消盡。

《外台》劉氏療小兒油丹赤腫方。

上用栝藹三大兩，以醞醋搗藥以敷之佳。

《外台》劉氏又方

上取蕎麥面以醋和，塗之瘥。

《外台》：《救急》療小兒赤丹，一名丹瘤方。

上取小豆搗末，以雞子白和塗之、以瘥為度。先以針決丹上，然後敷之。(《千金》亦療火丹。)

《外台》：《古今錄驗》療月內兒發丹方。

升麻(二分，《聖惠》用一分半) 黃芩(二分，《聖惠》用一分) 犀角(二分，《聖惠》用一分) 甘草(一分，炙，《聖惠》用半分) 柴胡(二分，《聖惠》用一分) 大黃(別浸二分，《聖惠》用一分) 蘭葉(切，三合，《聖惠》用一兩) 梔子仁(八分，《聖惠》用一分) 石膏(三分，《聖惠》用一分半)

上九味切，以水一升二合，煮取八合，下竹瀝四合，更煎取一半，去滓，分二服甚妙。

《外台》：《古今錄驗》又方

上搗藍汁塗之。

《外台》：《廣濟》療小兒丹毒方。

青藍汁(五合) 竹瀝(七合)

上二味相和，分為二三服。大小量之，一合至三合。

《簡要濟眾》治小兒丹毒從臍中起方。

伏龍肝(是年深灶下黃土，研為末)

上以屋漏水和如糊，敷患處，乾即再敷，以癢為度。用新汲水調亦得。

《修真秘旨》治小兒丹瘤方。

上用蓖麻子五個去皮，研入面，一匙水調，塗之甚效。

陳藏器治小兒丹毒方。

上以淬鐵水一合飲之，此打鐵器時堅鐵槽中水。

陳藏器治小兒丹毒寒熱，腹內熱結方。

上以積雪草搗，絞汁服之。(東人呼為連錢草，葉團如錢，蔓生溪間邊及陰濕地。)

陳藏器治小兒丹毒方。

上用旋花根、苗搗，絞汁服之。(俗呼鼓子花子也。)

《子母秘錄》治小兒丹煩方。

上用柳葉一斤，水一斗，煮取三升，去滓，洗赤處，日七、八度。

《子母秘錄》治癰瘡、疽、痔痛、惡瘡，小兒丹方。

上用桐木皮水煎，敷。

《子母秘錄》治癰疽、痔痛、惡瘡及小兒丹方。

上末蟬螬敷上。

《子母秘錄》治小兒丹方。

上用鯽魚肉細切五合，小豆搗屑三合，合和更杵如泥，和水敷上。

《食療》治小兒丹方。

上以鯉魚血塗之即癢。

姚和眾治小兒毒破作瘡，黃水出方。

上焦炒豉令煙絕，為細末，油調敷之。

《聖惠》治小兒一切丹，遍身壯熱，煩渴。升麻散方

升麻 川大黃(銼碎，微炒) 黃芩(各一分) 川朴硝 麥門冬(去心) 葛根(銼。各一分)

上件藥搗，粗羅為散。每服一錢，以水一小盞，煎至五分，去滓放溫，不計時候。量兒大小分減服之。

《聖惠》治小兒一切丹遍身赤痛大黃散方

川大黃(銼碎，微炒) 防風(去蘆頭。各半兩) 川升麻 黃芩 麻黃(去根節) 秦艽(去苗。各一分) 川朴硝(三分)

上件藥搗，粗羅為散。每服一錢，以水一小盞煎至五分，去滓放溫，不計時候。量兒大小分減服之。

《聖惠》治小兒一切丹發無常處，體熱如火燒，宜用升麻膏方。

川升麻 川大黃 景天草 蛇銜 梔子仁 寒水石 川芒硝 藍葉 生地黃 芭蕉根 羚羊角(屑) 梧桐皮(各半兩)

上件藥細銼，以竹瀝浸一宿，明日漉出，卻入鑊中，用臘月豬脂一斤，於慢火上熬一食久，承熱以綿濾去滓。候冷成膏，以瓷合盛。旋取摩之，兼以膏如棗核大，以竹瀝調服之。

《聖惠》治小兒一切丹，通用慎火草散方

慎火草 紫葛(銼) 硝石(各半兩)

上件藥搗，細羅為散，用冷水調塗之，乾即再塗，以瘥為度。

《聖惠》治小兒一切丹，遍身體熱。硝石散方

硝石(一兩) 乳香(一分)

上件藥細研為散，以雞子白調塗之。

《聖惠》又方

太陰元精石(一兩) 白礬(一分)

上件藥細研為散，以水調塗之。

《聖惠》又方

上以浮萍草，研如泥敷之。

《聖惠》又方

上以藍靛塗之，熱即更塗。

《聖惠》又方

上取菲畦中土，以水調塗之。

《聖惠》又方

上取粟米，以水煮濃汁洗之。

《聖惠》又方

上取地龍糞，以水研如泥塗之。

《聖惠》治小兒一切丹及諸毒腫方。

上鼠粘草根洗去苗，搗，絞取汁，每服半合。量兒大小，分減服之。

《聖惠》治小兒一切丹方。

上用芭蕉根搗，絞取汁，塗之。

《聖惠》又方

上取蒴 搗，絞取汁，塗之。

《聖惠》又方

上以景天花爛搗，敷之。

《聖惠》又方

上以川芒硝以水研，塗之。

《嬰孺》：凡小兒病丹，此病發起暴卒，急者不治。凡人養小之家，當先察審病源初起端倪，尋方觀圖，視病形象隨用別藥。余少探之，救瘥者甚眾，故複記之。治丹毒天下極驗無及水中藥。但有患熱毒、丹腫百藥不瘥者方。

上以水藻不拘多少，切爛搗熟，敷丹上，濃三分許，乾則易之，則瘥則止。

《嬰孺》治小兒丹方。

升麻 柴胡 石膏 梔子仁(各五分) 大黃 生葛(各八分) 子芩(六分) 犀角(屑) 杏仁 芍藥(各四分) 甘草(三分，炙) 竹瀝(八合)

上切，以水三升並瀝煮一升，為三服，此是一歲兒服量之。

《嬰孺》治小兒丹毒 方。

升麻 犀角(屑) 白朮 黃芩 梔子(各三兩) 藍葉(切，一升) 石膏(四合，碎) 生地黄(四兩)

上以水五升，竹瀝二升煮二升半，去滓。沾帛 之，乾即易。

《嬰孺》又方

●菜(切，一升) 豉(五合) 芒硝(五兩)

上杵，以水和如泥，封之。

《嬰孺》又方

上以豬槽下泥，敷之立已。

《嬰孺》又方

上黃龍湯服三合，並塗之。

《嬰孺》又方

上取生麻油塗之。

《嬰孺》治小兒惡毒、丹毒赤及風疹方。
上以甘草杵敷之。

《嬰孺》又方
上以小豆屑五合，生麻油和如泥塗之。

《嬰孺》又方
上杵蔓菁根敷之。

《嬰孺》又方
上取婦人月水衣洗，敷毒處，不洗中央散廣去。

《嬰孺》又方
上以白鵝血敷之，乾即易之。

《嬰孺》治小兒半身皆紅，漸漸長引者方。

牛膝 甘草(等分)
上切，以水五升煮之沸，去滓，和灶下黃土封之。

錢乙治熱毒瓦斯客於腠理，搏於血氣，發於外皮，上赤如丹。白玉散方

白土(一分) 寒水石(半兩)
上末之，用米醋或新水調塗。

張銳《雞峰方》治丹瘤。
上搗細，豆豉水和敷之。

張銳《雞峰》又方
上梔子去皮，為末，水調塗之。

張銳《雞峰》又方
上生地黃搗爛取汁，塗之。

張銳《雞峰》又方

大黃(末) 芒硝(等分)
上合研勻，水調塗之。

《劉氏家傳》小兒發丹方。

當得草子或葉(小兒多摘搭額者) 沙菟(等分)
上搗爛，絹裏磨患處，立效。

《莊氏家傳》治丹瘤方。

上木鱉子新者去皮，細研醋調，以雞翎敷，隨手消。

《孔氏家傳》治小兒丹瘤方。

赤小豆 蛤粉

上等分為末，用園葵汁調塗。

《吉氏家傳》治小兒丹、瘡遍赤方。

上末浮炭(打鐵者)。細羅蜜調，敷之隨手瘥。

《吉氏家傳》發丹，遍身熱，服前《聖惠》六味升麻散後，更宜塗此方。

滑石 乳頭香(各一分)

上以雞子清調塗之。

《吉氏家傳》治小兒丹毒、癩疹方。

上天麻末，每服半錢。或丈夫、婦人每服二錢，紅酒調下。

土虺第三

《養生必用》治土虺丹，發兩手指作紅絲，迤漸下行至關節便殺人。惡瘡、蟲子咬並治方。

大赤足蜈蚣(二條) 白礬 膽礬(各一錢) 麝香(半錢)

上為細末，每用一剌耳許，先以針撥破瘡口，安藥在內，以醋面粉紙花子貼定，日一換，好肉生，膿血、惡肉盡去，即貼膏藥。

眼丹第四

《集驗方》治小兒眼卒然赤腫、生翳，至有十數翳者，名眼丹方。遲救之，必能損目。上令患者仰臥，以紅錢纏並剪刀刃，卻安在患者眼上，以三姓老婦人各拈艾炷一枚，在剪刀上灸之。仍人祝云：不灸病患，只灸眼丹。如此三遍，候煙斷，將此剪刀棄之宅後，或無人行處路上，隔宿收之，神效。

五色丹第五

《巢氏病源》小兒五色丹候：五色丹發而變改無常，或青、黃、白、黑、赤，此由風毒之熱，有盛有衰，或冷或熱，故發為五色丹也。

《千金》治小兒五色丹方。

上搗蒴 葉敷之。

《千金》又方

上以豬槽下爛泥敷之，乾則易。(《集驗》治卒赤黑丹)

《千金》又方

上服黃龍湯二合，並敷患上。

《聖惠》治小兒五色丹方。

川大黃 黃芩 川芒硝 梔子仁 乾藍葉 商陸(各一兩)

上件藥搗，細羅為散，以水調塗之，立效。

《聖惠》治小兒五色丹遍身，宜用洗浴。棗根湯方

棗根(四兩) 丹參(三兩) 菊花(一兩半)

上件藥細銼和勻，每用二兩，以水五升，煎至三升，去滓，看冷熱，避風洗浴，極效。

《聖惠》又方

苧根葉(一斤，細銼) 赤小豆(三合)

上件藥以水五升，煎至三升，去滓，看冷熱，避風洗浴。

《聖惠》治小兒丹，發惡毒五色無常，宜用此方。

上青粟球有刺者搗碎，以水煮洗之。

《聖惠》又方

上用赤小豆末，以雞子白和如泥，頻塗。

《聖惠》治小兒五色丹，遍身熱如火燒，繞腰即損人，宜用此方。

上以芸薹子一兩細研，酒一小盞，研取汁，塗之。

《孔氏家傳》治小兒五色丹方。

上以小柴胡湯如法煎，飲清汁，滓敷丹上，良效。

伊芳火丹第六

《巢氏病源》小兒伊芳火丹候：丹發於膀骨，青黑色，謂之伊芳火丹也。

《顛凶經》伊芳火丹從兩脅起。

上用豬糞燒灰，並鐵槽中泥拌調塗之，日三。

火丹第七

《巢氏病源》小兒 火丹候：丹發於臂、背、穀道者，謂之 火丹也。

《顛凶經》火丹從背甲起。

上用生麻油合豬槽下泥，塗之。

《嬰孺》治 火丹發從背起，或走兩足，赤如火方。

景天草(十兩) 真珠(一分)

上和杵為泥, 封丹上。

《嬰孺》治丹入腹及下至卵者不治方。

麻黃(炒) 升麻(各二分) 硝石(四分)

上為末, 以井華水服方寸匕, 日三。一方用大黃半分。

茱萸丹第八

《巢氏病源》小兒茱萸火丹候：丹發初從背起, 遍身如細縷, 謂之茱萸火丹也。

《千金》治小兒茱萸丹, 病初從背起, 遍身如細縷, 一宿成瘡者方。

上用赤小豆作末以粉之, 如未成瘡者雞子白和, 敷之。

赤丹第九

《巢氏病源》小兒赤丹候：此謂丹之純赤色者, 則是熱毒搏血氣所為也。

《聖惠》：夫小兒赤丹者, 由風毒之重, 故使赤也。初發疹起, 大如連錢, 小者如麻豆, 肉上生粟, 色如雞冠, 故謂之赤丹, 亦名茱萸丹也。

《千金》治小兒赤丹方。

上用芸薹葉汁, 服三合, 滓敷上良。(《千金翼》云：末芸薹以雞子白和, 塗之。)

《千金》治小兒赤丹斑駁方。

上唾和胡粉, 從外向內敷之。

《千金》又方

上 鐵屎以豬脂和, 敷之。

《千金》又方

上屋塵和臘月豬脂敷之。

《兵部手集》治孩子赤丹不止方。

上以土番黃米粉、雞子白和, 敷之。(黃米粉, 黃粱米粉也。)

《兵部手集》又方

上以蕎麥面醋和, 敷之瘡。

《兵部手集》又方

上以胡葵汁, 敷之瘡。譚氏方同。

《兵部手集》又方

上研粟米敷之。

《聖惠》治小兒赤丹毒腫升麻膏方

川升麻 白藪 漏蘆 川芒硝(各一兩) 黃芩 枳殼 連翹 蛇銜(各一兩半) 梔子仁 蒴 (各二兩)
上件藥細銼，以豬脂一斤半入於鑊中。以慢火煎諸藥令赤色，去滓放冷，以瓷合盛，旋取塗之。

《聖惠》治小兒面身卒得赤丹，或癢，或腫起，不速療之即殺人，宜用此方。

上以 羊角屑八兩，水五升，煎至一升，絹濾去滓，入煉了豬脂五兩和令勻，摩之。

《聖惠》又方

上以葛勒蔓輕磨破，以醋研訶梨勒，塗之妙。

《嬰孺》治小兒赤丹斑駁方。

上以蓼子監湯洗了，蓼塗之。

《嬰孺》又方

上車前子為末，粉之。

《嬰孺》又方

上蠶砂以水二升煮汁，洗之。

張渙 升麻膏方 治赤丹初發，肉色如朱色，如雞冠，又名茱萸丹。

川升麻 白藪 漏蘆 川芒硝(各一分) 連翹 梔子仁(各半兩)

上件藥細銼，以豬脂半斤入鑊中，用慢火煎諸藥，令赤色，去滓放冷，以瓷合盛。旋取每用少許，塗患處。

《莊氏家傳》治小兒丹，流如火焰紅赤。水輪散方

上赤腳蜈蚣瓦上慢火焙乾為末，入石硫末少許，新汲水調，鵝毛掃頭焦即止。

白丹第十

《巢氏病源》小兒白丹候：丹初是熱毒挾風熱搏於血，積蒸發赤也。熱輕而挾風多者，則其色微白也。

《聖惠》：夫小兒白丹者，由挾風冷之氣，故使色白也。初發癢痛，微虛腫，如吹疹起，不痛不赤，而白色也。

《千金》治小兒白丹方。

上燒豬屎灰，雞子白和，敷之良。

《聖惠》治小兒白丹方。

酸母草 五葉草(各五兩)
上件藥搗，絞取汁，塗之。

《聖惠》又方
上搗川大黃末，以馬齒莧搗，絞取汁，調塗之。

《聖惠》又方
上以蘭香葉搗爛，塗之。

《聖惠》又方
上以蓼葉搗爛，塗之。

《聖惠》又方
上以梁上塵，以醋和，塗之。

《聖惠》又方
上取鹿角燒灰，細研，以豬脂和，塗之。

《嬰孺》**五香湯** 治小兒風熱毒腫色白，或乃惡核瘰癧，附骨癰疽，節解下丹白色，游走遍身，白癩疹方。

木香 薰陸香 海藻(各一分) 麝香(半兩) 沉香 枳實(麩炒) 升麻 射乾(各二分) 大黃(八分) 竹瀝(三合)
上以水四升，下瀝煮一升二合，分溫服之。

張渙 **香鼓散** 治白丹，疔痛，虛腫如吹方。

香鼓(二兩，炒令焦) 伏龍肝(一兩，在灶裡黑土是也)
上件搗，羅為細末。每服半錢，以生油調塗患處。

黑丹第十一

《聖惠》：夫小兒黑丹者，由風毒傷於肌肉，故令色黑也。初發癢痛，或煙毒起微黑色也。

《聖惠》治小兒黑丹，宜 升麻湯方。

川升麻 漏蘆 川芒硝(各二兩) 黃芩(三兩) 梔子仁(一兩) 蒴(半兩)
上件藥細銼，和勻。每用三兩，以水五升，煎至三升，去滓微溫。以軟帛旋蘸 病上，以消為度。

《聖惠》又方

風化鍛石(二兩) 屋四角茅草(三兩，燒灰)
上件藥細研為散，以雞子白調塗之，日三五度，效。

《聖惠》又方

芫蔚子 蛇銜草 護火草(各一兩)
上件藥搗令爛，以雞子白調塗之。

《聖惠》又方
上以青羊脂熟摩，日三、五度用之。

《聖惠》又方
上以豬槽下泥塗之。

《聖惠》又方
上以喂豬杓子炙令熱，熨之。

張渙 祛毒散方 治丹黑色癢痛腫處。

川升麻 漏蘆 川芒硝(各二兩) 黃芩 梔子仁(各一兩)
上件搗為粗末。每用兩匙頭，以水三盞煎至兩盞，去滓微熱，以軟帛旋蘸 瘡上，以消為度。

天雷丹第十二

《顛凶經》：天雷丹從頭項起。
上用陰乾蔥、赤末拌脂塗。又用灶下土、雞子白調塗。

天火丹第十三

《巢氏病源》小兒天火丹候：丹發遍身體，斑赤如火之燒，故謂之天火丹也。

《聖惠》：夫小兒丹發肉中，有赤如丹，赤色大者如手，劇者遍身赤癢，故號天火丹也。

《顛凶經》天火丹從腹背遍身起方。
上用樺皮白末和，生油調塗之。亦用赤石脂、羊脂調塗之。

《千金》治小兒天火丹，肉中有赤如丹色，大者如手，甚者遍身。或痛、或癢、或腫方。
上用赤小豆二升末之，雞子白和如薄泥，敷之，乾則易。一切丹並用此方皆便瘥。

《千金》又方
上生麻油塗之。

《聖惠》治小兒天火丹，發遍身，赤如絳色，宜用此方。

麻油(五合) 生鯽魚(半斤)
上件藥，搗如泥，塗在丹上，燥複塗之。

《聖惠》又方

虎脂(二兩) 黃丹(一兩)

上件藥研為膏塗之即瘥。

《聖惠》又方

上以鬼目搗，絞取汁，塗赤處。

《聖惠》又方

上搗荏子汁塗之。

《聖惠》又方

上取小兒埋胞衣餅子中水一、二合與兒服，及塗身上有毒處。

張渙 **丹參散方** 治丹發遍身，赤如絳色，癢痛甚者乃名天火丹。

丹參 桑根白皮(各一兩) 甘菊花 莽草(各一兩)

上搗為粗末。每用藥三匙頭，以水三碗煎至兩碗去滓，看冷暖，避風處浴兒。(《聖惠》、《嬰孺》皆同。

《聖惠》以菊花為一兩半)

殃火丹第十四

《巢氏病源》小兒殃火丹候：丹發兩脅及腋下、膀上，謂之殃火丹也。

《千金》治小兒殃火丹，每著兩脅及腋下者方。

上伏龍肝末和油敷之，乾則易。若入腹及陰，以慎火草取汁，服之。

《聖惠》治小兒殃火丹，生於脅、腋下方。

上川朴硝細研為散。每服以竹瀝調下半錢。量兒大小，加減與服之。

《聖惠》又方

上以浮萍草搗，絞取汁，時時與兒服之。

張渙 **拔毒散方** 治丹發生於兩脅及腋下，乃名殃火丹。

川朴硝(一兩) 梔子仁(半兩)

上件搗，羅為細末，每用半錢。好醋調塗患處，次用山梔膏方。

山梔子仁(四兩) 生鯽魚(半斤)

上同搗如泥。每用少許，以醋化，看丹發患處塗之。

神氣丹第十五

《顛凶經》：神氣丹從頭背上起。

上用牯牛骨燒灰，羊脂調塗之。

神火丹第十六

《巢氏病源》小兒神火丹候：丹發兩膀，不過一日便赤黑，謂之神火丹也。

《聖惠》治小兒神火丹方。

上景天花搗，絞取汁，先微揩丹上，後塗之，以瘥為度。《嬰孺》方同云：先刺丹上，令血出塗刺上。

《聖惠》又方

上以鯽魚半斤，搗如泥，塗丹上，唯數塗為良。

《聖惠》又方

上以梔子仁搗末，用醋和塗之。

神灶丹第十七

《顛凶經》：神灶丹從肚起。

上用土蜂窠、杏仁、膩粉、生油調塗，立瘥。

鬼太丹第十八

《巢氏病源》小兒鬼火丹候：丹發兩臂，赤起如李子，謂之鬼火丹也。

《顛凶經》：鬼火丹從面上起。

上用灶下土，雞子白調，塗之立瘥。

《聖惠》治小兒鬼火丹方。

戎鹽（一兩） 附子（一枚，燒灰）

上件藥細研為散，以雄雞血調塗之。

《聖惠》又方

景天草（五兩） 蛇銜草（三兩）

上件藥搗如泥，以雞血調塗之。

《嬰孺》：鬼火丹初發兩臂起，赤如小豆及大豆治之方。

上用苦桃皮煮汁，浴之。

《嬰孺》又方

上用虎脂隨病塗之。

張渙 戎鹽散方 治丹發兩臂赤起如李子乃名鬼火丹。

戎鹽（一兩） 附子（一枚） 雄黃（半兩，細研，水飛）

上件同研細。每用少許，以雄雞血調塗患處。

野火丹第十九

《巢氏病源》小兒野火丹候：丹發赤斑斑如梅子，遍背腹，謂之野火丹也。

《千金》治小兒野火丹病，遍身皆赤者方。

上用油塗之。（《嬰孺》云：生麻油塗。）

《聖惠》治小兒野火丹方。

雄黃 戎鹽（各半兩）

上件藥細研為散，以雞子白調，數數塗之，以瘥為度。

《聖惠》又方

灶中黃土（一兩） 青竹葉（二兩，燒灰）

上件藥細研為散，以雞子白和塗之。

《聖惠》又方

白僵蠶（二七枚） 慎火草（一兩）

上件藥搗令爛，塗之。

骨火丹第二十

《巢氏病源》小兒骨火丹候：丹發初在臂起，正赤若黑，謂之骨火丹也。

《千金》治小兒骨火丹，其瘡見骨方。

上搗大小蒜，濃封之，著足踝者是。

《嬰孺》治小兒骨火丹刺腫上入二分。

上以黃末、牛膽汁和，塗之。

家火丹第二十一

《巢氏病源》小兒家火丹候：丹初發著兩腋下，兩膀上，名之家火丹也。

《嬰孺》治家火丹發如大指，日長一寸，偏旁兩頰方。

梓木白皮（二兩） 蓼葉（三兩）

上燒灰，雞子白和如泥，敷丹上，日四、五上。（《聖惠》方同，但二味等分。）

《嬰孺》治家火丹攻喉，入腹大便不利方。

硝石 凝水石（各二兩）

上研入銅器中熬令乾，取研。服方寸匕，未瘥加之。

《嬰孺》又方

烏頭(一分) 赤石脂(三分)

上為末，雞子白和，塗丹上，日進三服，神良。

火丹第二十二

(丹火附)

《巢氏病源》小兒火丹候：火丹之狀往往如傷寒赤著身，而日漸大者，謂之火丹候。

《巢氏病源》小兒丹火候：丹火之狀，發赤如火之燒，須臾 漿起是也。

《嬰孺》云：火丹者，往來如傷寒赤著身體，不從傷火而得名。赤如日出時，以從其處，又名日丹。宜同用

《千金》漏蘆湯。治小兒熱毒癰疽，赤白朱丹瘡癤。(漏蘆湯方見癰門。)

《千金》治小兒火丹赤如朱，走皮中方。

上以醋和豉研，敷之。

《千金》又方

上鯉魚血敷之，良。

《千金》又方

上搗荏子敷之，良

《千金》又方

上豬屎水和，絞取汁，服少許良。

《仙人水鑿》治火丹瘡方。

蕎面 黃連(各少許)

上同研令細，塗之立瘥。切不得入油及鹽。

《廣利方》：小兒火丹，熱如火繞腰即損。

上杵馬齒菜敷之，日二。

《嬰孺》治小兒火丹走皮中赤者方。

上梔子末以醋和，敷之。

《嬰孺》又方

上鯉魚杵爛，或片拓之。

《嬰孺》治小兒天火丹者，凡小兒肉中有赤如丹色，大者如手極，遍身赤癢而微淫者方。

上小豆二升為末，雞子白和，封之。遍身者合塗之令遍。

《嬰孺》治小兒火丹方。

上取不犯水羊脂向火上炙，敷丹上，以白粉粉之，大良，無忌。

螢火丹第二十三

《巢氏病源》小兒螢火丹候：丹發如灼，在脅下正赤，初從額起而長上痛，是螢火丹也。（《顛凶經》乃云從耳起。）

《顛凶經》治螢火丹。

上用慎火草搗汁，和酒調塗之。（《聖惠》以醋調塗。）

《聖惠》治小兒螢火丹方。

赤小豆（一合） 硝石（半兩） 寒水石（一分）

上件藥搗，細羅為散。每服以冷水調下半錢，日三服。量兒大小加減服之。（《嬰孺》一料用硝石三錢一字。）

《聖惠》又方

灶中黃土（一合） 生油（二合）

上件藥研，和如泥，時用塗之，以癢為度。若痛上陰，不治即殺人。

《嬰孺》澤蘭湯 治螢火丹走癩疹入腹殺人方。

澤蘭 芎（各三分） 附子（炮） 莽草 本 細辛 茵芋（各二分）

上以水三升煮一升半為四服，此湯外並用粉粉病上。

朱田火丹第二十四

《巢氏病源》小兒朱田火丹候：丹先發背起遍身，一日一夜而成瘡，謂之朱田火丹也。

《顛凶經》朱田火丹赤豆色，遍身上起。

上用慎火草搗汁，和酒調塗之。

《千金》治小兒朱田火丹，病一日一夜即成瘡。先從背起，漸至遍身如棗大，正赤色者方。

上濃煮棘根汁洗之。已成瘡者赤小豆末敷之，未成瘡者雞子白和小豆末敷之。凡方中用雞子者，皆取先破者用之，未破者無力。

《聖惠》治小兒朱田火丹方。

上以藍靛塗之。

《聖惠》又方
上以雞子白塗之。

胡吹灶丹第二十五

《顛凶經》胡吹灶丹從陰囊上起。
上以水茄窠下泥和苦酒塗之。

胡漏灶丹第二十六

《顛凶經》胡漏灶丹從臍中起。
上用屋漏水調灶中土塗之。

土灶丹第二十七

《顛凶經》土灶丹從陰蹠起。
上用屋四角茅草、灶橫麻及雞子白調，塗之。

天灶火丹第二十八

《巢氏病源》小兒天灶火丹候：丹發兩 裡尻間，正赤流陰頭，赤腫血出，謂之天灶火丹也。

《千金》治小兒天灶火丹，病從脾間起，小兒未滿百日，犯行路灶君，若熱流下令陰頭赤腫血出方。

上伏龍肝搗末，雞子白和敷之，三日良。

《千金》又方

鯽魚肉(銼，五合) 赤小豆(末，三合)
上二味和搗，少水和，敷之良。

《聖惠》治小兒天灶火丹方。

薺葉 青羊脂(各三兩) 赤小豆(一合) 爐門上灰(五兩) 蔥白(一莖，切)
上件藥相和，搗如膏。摩之 燥再摩之。

《聖惠》又方

細辛(一兩) 糯米(一合) 景天草(三兩)
上件藥搗如泥塗丹上，瘥。

《聖惠》又方

上以車前子末水調塗之。

《聖惠》又方

上以蠶沙一升，水煮，去滓洗之。

《聖惠》又方

上以鐵落末用錫和如膏，塗之。

《嬰孺》治天灶火丹，初發著腳脛間方。

細辛(二兩) 白生米(一合) 景天(五兩)

上同杵如泥敷之。

《嬰孺》又方

上桑根切二升，以水一升煮一沸，去滓，浴之，日三，不瘥更合。

《嬰孺》又方

上取生浮萍杵為泥敷之。或取汁塗，惟多遍良。

張渙 赤豆散方 治丹發兩 裡尻間正赤流至陰處，乃名天灶火丹。

赤小豆(末) 伏龍肝(細研，灶中黑土是也。各一分)

上件藥再同研細，每用一錢，以雞子白調塗患處。

廢灶火丹第二十九

《巢氏病源》小兒廢灶火丹候：丹發從足趺起，正赤者，謂之廢灶火丹也。

《顛凶經》廢灶丹從曲臂起。

上用屋四角茅草灰，雞子白調，塗之。

《千金》治小兒廢灶火丹，初從足趺起，正赤色者方。

上以棗根煮汁，沐浴五、六度。

《聖惠》治小兒廢灶火丹方。

赤小豆(末，一兩) 牛角(二兩，燒灰)

上件藥細研為散。用雞子白調如泥塗。(《嬰孺》云：牛角燒之作聲，兼治青黑石丹。)

《嬰孺》治廢灶丹初發之時，起兩腳亦如火燒方。

上五加葉、根燒灰，以 爐槽中水和，塗之，惟瘥止。

《嬰孺》治廢灶丹初起足趺正赤。

上桑根煮汁洗五遍。

張渙 莽草散方 治丹發從足趺起正勻赤，乃名廢灶火丹。

莽草 寒水石 硝石(各半兩)

上件藥搗，羅為細散。每用以新汲水調塗患處。

尿灶火丹第三十

《巢氏病源》小兒尿灶火丹候：丹發膝上，從兩股起及臍間走入陰頭，謂之尿灶火丹也。

《顛凶經》尿灶丹從踝起。

上用屋四角頭茅草燒灰，以雞子白調，塗之。

《千金》治小兒尿灶丹，初從兩股起及臍間走入陰頭皆赤色者方。

上以水二升、桑皮切二升，煮取汁，浴之良。（《千金》一方用桑根皮煮。）

《千金》又方

上燒李根為灰，以田中流水和，敷之良。

張渙 二根湯方 治丹發膝上，從兩股至臍間走入陰處，乃名尿灶火丹。

桑根白皮 李子根（各四兩）

上件細銼。每用三匙頭，以水兩碗煎至一碗，去滓，看冷熱避風淋患處。

野灶丹第三十一

《顛凶經》野灶丹從背脊起。

上用柔香茸、蒴、赤小豆末塗之立瘥。

大孕丹第三十二

長沙醫者鄭愈傳治小兒大孕丹，諸般毒聖塗散方。

凌霄花 萬州黃（各一字） 苧根（半兩，切，焙乾用）

上一處爛研，以酒調，和蜜同調，服少許，塗於丹上立消。

爾朱丹第三十三

《嬰孺》治小兒爾朱丹及一切丹粉散方。

牡蠣（赤） 烏頭（燒） 麻黃根（各三分） 石膏（一分） 真珠（二分） 麝香（半分）

上方六味為末，以粳米粉二升合和為散，火中小炒，須冷絹袋盛，以粉粉遍身大佳。夫丹治爾朱有瘡，汁以粉粉之，無不立愈。以麻油塗病上，然後以粉粉之大驗。

赤流丹第三十四

《聖惠》：夫小兒身上或一片片赤色如燕脂染，及熱漸引，此名丹毒。俗謂之流。若因熱而得者色赤，或因風而得者色白，皆腫而壯熱也。可用一小鉞刀散鑷去惡血，毒未入腹者可療也。

《圖經》治小兒游瘤丹毒方。

上以冷水調剪刀草化如糊，以雞翎掃之，腫便消退，其效殊佳。

《圖經》又方

上以老鴉眼睛草葉入醋細研，治小兒火焰丹，消赤腫。即天茄子也。

《聖惠》治小兒心熱，身上赤流色如燕脂，皮膚壯熱。**升麻散方**

川升麻 川朴硝 川大黃(銼碎，微炒) 元參(各半兩) 犀角(屑) 黃芩 梔子仁 甘草(炙微赤，銼) 木通 q(銼。各一分)

上件藥搗，粗羅為散。每服一錢，以水一小盞煎至五分，去滓放溫，不計時候。量兒大小分減服之。

《聖惠》治小兒赤流熱如火，宜用此方。

護火草汁(三合) 赤地利(末) 膩粉(各一錢)

上件藥相和，量兒大小分減服之。良久瀉下血片為效。其滓敷在赤處亦佳。

《聖惠》治小兒赤流，半身色紅，漸漸展引不止方。

牛膝(一兩，去苗) 甘草(半兩，生用)

上件藥細銼，以水一大盞煎至五分，去滓，調伏龍肝末，塗之效。

《聖惠》又方

川大黃(一兩，生用) 赤小豆(半兩，炒令紫色) 川朴硝(三分)

上件藥搗，羅為末，以雞子清調塗之，乾則易之。

《聖惠》又方

李子油(三兩) 朱砂(一分，末)

上件藥調如膏塗之。

《聖惠》又方

上以醬汁塗之。

《聖惠》又方

上以蘿摩汁塗赤處，隨手便瘥。

《聖惠》又方

上蕎麥面，以醋調塗之，不過三兩度瘥。

《聖惠》又方

上以胡荽汁塗之。

《聖惠》又方

上用白礬一兩，以水煮，冷暖得所洗之。

《聖惠》又方

上取燒粉家洗瓮水塗之。

《聖惠》又方

上取紅藍花末，以醋調塗之。

《聖惠》又方

上以芸薹葉爛搗塗之。

《聖惠》又方

上砒霜不限多少細研，於硯中著水，入霜，以墨濃研，用筆點塗之，良久，以冷水洗後，更塗，以瘡為度。

《聖惠》又方

上栝萎根搗末，以醋調塗之，乾即更塗。

《聖惠》又方

上糯米水研，稀粥塗之，乾即更塗。

《聖惠》又方

上粟米粉炒令黑，以唾調塗之。

《譚氏殊聖方》：五游忽發遍身形，恐悚令人怕怖驚。乍腫剎那生滿體，莫冤神鬼錯看承。甘泉硝石蒼龍骨，感攝消磨去痛疼。更取鐵槽連底水，調和頻掃便身輕。

消腫散

清泉硝石 白龍骨(各一兩)

上研細，淨器內盛。若有患赤瘤丹及毒瘡者，以鐵槽水調一錢，掃塗立瘥。

張渙 消毒散方 治諸丹赤流，初發甚者。

川升麻 黃芩(各半兩) 麥門冬(去心) 川大黃(銼碎，微炒) 川朴硝(各一分)

上件藥搗，粗羅為散。每服一錢，以水一小盞煎至五分，去滓，放溫服，不計時候。量兒大小加減。

張渙 棗根浴湯方 治丹發而變改無常。

棗木根(四兩) 丹參(三兩) 菊花(二兩)

上件藥細銼拌勻。每用兩匙頭，以水二碗煎三、五沸，看冷熱避風處浴兒極佳。

張渙 木通散方 治身體赤流，片片赤色如燕脂染，毒瓦斯漸引者。

木通(一兩) 川升麻 川大黃(銼碎，微炒) 川朴硝(各半兩) 甘草(炙微赤，銼) 梔子仁(各一分)

上件藥為粗散。每服一錢，以水一小盞煎至五分，去滓，放溫服，不計時候。量兒大小加減。

張渙 截毒散方 治赤流熱如火者。

川大黃(生用) 鬱金 黃藥 膩粉 豬牙皂角(去皮子用。各半兩)
上件藥搗羅極細，每用少許，看赤處以生油調塗患處。

赤游腫第三十五

《巢氏病源》小兒赤游腫候：小兒有肌肉虛者，為風毒熱氣所乘，熱毒搏於血氣，則皮膚赤而腫起，其風隨氣行游不定，故名赤游腫也。

《本草》治小兒患赤白游腫。

上用蝦搗碎敷之。(蝦無須及煮之白色者皆不可食，生水田及溝渠中者有小毒，又 內者甚有毒爾。)

《顛凶經》治孩子赤游腫或如丹，煩渴，渾身赤溜壯熱方。

綠豆粉 鉛白霜

上細研芸薹汁調塗之。

《顛凶經》取鉛霜法：將鉛來於石上，打令薄，掘地作坑，可鉛片大，以杵搗坑實，滿坑著醋，以鉛蓋定，經一宿去取，霜如珠子大，刮下藥使之。如煩渴以後方解。

解熱飲子方

麥門冬 小蘆根 竹葉 乾葛(搗末) 木漏蘆 犀角(屑。各等分)

上用水四合，藥半兩煎一合，無問食前後，徐徐與之服。

《千金》治小兒赤游腫，若遍身入心腹即殺人方。

上搗伏龍肝為末，以雞子白和敷。乾易之。

《千金》又方

上白豆末水和敷之，勿令乾。

《子母秘錄》治小兒赤游行於身上下至心即死方。

上以芒硝內湯中，取濃汁，以拭丹上。

《子母秘錄》又方

上水中苔搗末，敷上良。

《子母秘錄》又方

上蒴 煎汁洗之。

《子母秘錄》又方

上搗生景天敷瘡上。

《子母秘錄》又方
上搗芭蕉根汁煎，塗之。

《子母秘錄》又方
上杵菘菜敷上。

陳藏器治小兒熱毒游腫方。
上破草鞋和人亂髮燒作灰，醋和，敷之。

《兵部手集》治小兒游丹赤腫方。
上蕎麥面醋和，敷之良。

《聖惠》治小兒赤游，皮膚作片赤腫，此是風熱所致，宜服犀角散方

犀角(屑) 黃芩 黃(銼) 川升麻 梔子仁 漢防己 川朴硝(各一分) 牛黃(半分，細研)
上件藥搗，細羅為散。不計時候，煎竹葉湯調下半錢。量兒大小加減服之。

《聖惠》治小兒頭面及身體赤毒腫起作片，宜用升麻膏方

川升麻(一兩) 生地黃(二兩) 犀角(屑) 射乾 赤芍藥 黃芩 梔子仁 川大黃 大青 藍子 元參 羚羊角(屑。各半兩)
上件藥細銼，以豬脂一斤半，入於鑊中，慢火上煎，不住手攪，候藥色變，膏成，去滓，以瓷合盛，頻用摩腫處。

《聖惠》又方

黃柏(末) 川朴硝(細研) 川大黃(末，各半兩) 馬勃 水銀(手心內津研令星盡。各一分) 雞子(三枚，去殼)
上件藥都研如膏。每用時先以鉞針鉞破，然後以膏塗之。

《聖惠》又方

雞冠花 商陸 紫礦 川大黃(各半兩)
上件藥搗，細羅為散。以雞子清入生油等分，調塗之，乾即更塗。

《聖惠》又方

附子(去皮臍) 川椒(去目。各半兩) 石鹽(三分)
上件藥搗，羅為末，以煉了豬脂四兩相和，於慢火上熬成膏，以瓷合盛，候冷時用，塗之，以瘥為度。

《聖惠》又方

栝蔞根(二兩，末) 伏龍肝(半兩)
上件藥細研為散，以醋調塗之，乾即再塗。

張渙 防己散方 治風熱邪毒搏於血氣，則皮膚赤而腫起，游走不定，乃名赤游腫。

漢防己(半兩) 川朴硝 犀角(屑) 黃芩 黃耆(銼) 川升麻(各一分)
上件藥搗，羅為細末。每服半錢，煎竹葉湯調下。量兒大小加減服之。

《劉氏家傳》治走馬胎赤腫，走入心腹則不救方。

生槐葉(一握) 生栝萐(去皮，合槐葉研爛) 赤小豆(末。各等分)
上和塗患處立效，此藥神效。

《莊氏家傳》治小兒游丹赤腫方。
上栝萐三兩，以醞醋搗，敷之。

身有赤處第三十六

(血疽附)

《巢氏病源》小兒身有赤處候：小兒因汗為風邪熱毒所傷，與血氣相搏，熱氣蒸發於外，其肉色赤而壯熱是也。

《葛氏肘後》治身上有赤腫處者。

上熬粉令黑，和唾塗之。

《千金》治小兒半身皆紅赤，漸漸長引者方。

牛膝 甘草(炙)
上二味 咀，合得五升，以水八升煮三沸，去滓，和伏龍肝末敷之。

《千金》治小兒身赤腫起者方。

伏龍肝 亂髮(灰)
上二味末之，以膏和，塗之。

《聖惠》治小兒身上有赤引於頰上或口旁、眼下，赤如燕脂，面上皮即皴剝，漸漸引多，此是心熱血凝所為。其治法宜以小刀子鋒頭鑱破，令血出後宜服丹參散方

丹參 黃芩 枳殼(麩炒微黃，去瓢) 葛根(銼) 犀角(屑，以上各一分) 麻黃(半兩，去根節)
上件藥搗，粗羅為散。每服一錢，以水一小盞，入竹葉十片、竹茹半分煎至五分，去滓放溫，不計時候。量兒大小分減服之。

《聖惠》治小兒身上有赤，煩熱。麥門冬散方

麥門冬(去心) 蘆根(銼) 葛根(銼) 犀角(屑) 甘草(炙微赤, 銼) 漏蘆(各半兩)

上件藥搗, 粗羅為散。每服一錢, 以水一小盞, 入竹葉十片煎至五分, 去滓放溫、不計時候。量兒大小分減服之。

《聖惠》治小兒身上有赤, 或癰腫, 或如火丹, 煩渴, 渾身赤引壯熱。鉛霜散方

鉛霜 綠豆粉(各半兩)

上件藥細研為散, 以芸薹菜汁調塗之。

《聖惠》又方

上桃仁湯浸去皮, 研令爛, 以面脂和塗。

《聖惠》又方

上黃蒿穗, 以水濃煎湯, 入鹽少許, 溫溫洗之。

《聖惠》又方

上白礬細研, 以生油調塗之。

《聖惠》又方

上芭蕉根搗, 絞汁塗之。

《聖惠》又方

上水中苔搗末, 以水調塗之。

《聖惠》又方

上川芒硝以水研塗之。

《吉氏家傳》治小兒腿上並座處血疽方。此疾但有赤色如燕脂, 漸引闊如錢大, 或手掌大, 皮膚光緊, 此名血疽。此因心熱, 心主血, 血得熱即凝聚不散, 宜用此藥。

上以鍛石炒令極熱即以水沃之, 澄清三度, 敷之。

赤白溜第三十七

《聚寶方》牛黃散 治小兒初生至二、三歲一切風發赤白瘤走癢四肢方。

牛黃 朱砂 蝸牛肉 乾蠍(全者) 白僵蠶(直者) 天麻 白附子 乳香 麝香(各一分) 生龍腦(一錢) 螳螂翅(五對, 七月中采)

上十一味為細末。每服一字, 薄荷水調下。初生兒洗了後, 用乳少許調塗口中, 胎疾永除。

卒腹皮青黑第三十八

《巢氏病源》小兒卒腹皮青黑候：小兒因汗腠理則開而為風冷所乘, 冷搏於血, 隨肌肉虛處停之, 則血氣沉澀不能榮其皮膚, 而風冷搏於腹皮, 故青黑也。

《嬰童寶鑒》：小兒血凝為初生下時肌未成肉，以新綿及濃衣衣之，血被熱而不結變為肌肉，故凝也。其候身上青黯，哭而無聲，不乳是也。

《千金》治小兒卒腹皮青黑方。

上以酒和胡粉敷上，若不急治，須與便死。

《子母秘錄》治小兒卒腹皮青黑赤，不能喘息，即急用此方。

上用女青末內口中，酒服。亦治大人。

《聖惠》治小兒卒腹皮青黑不能喘息，宜急用此方。

上苦參一兩銼搗，細羅為散，不計時候，以醋湯調下半錢。量兒大小以意加減。

《聖惠》又方

上取爛棺木半兩，以醋一中盞煎至六分，去滓，溫服半合。量兒大小，以意加減服之。

《聖惠》又方

上取荊子搗，入少水絞取汁，暖服半合。量兒大小以意加減。

《千金》灸法：治小兒卒腹皮青黑，不急治須與即死。灸臍上下左右，去臍半寸並鳩尾骨下一寸，凡五處各三壯。